

مسرحية

# الدماغ

تأليف هانى مهران

الزمن : الحديث

المكان : داخل الدماغ

الشخصية : المرأة (عقل المرأة )

المنظر

مكان غير مفهوم المعالم به بعض البؤر الضوئية .. مع مجموعة من الخيوط  
تشبه الشرايين .. يوجد كتل صماء متفرقة سوداء تقع فى أماكن مختلفة ومتفرقة  
فى المسرح .. توجد كتل هلامية الشكل معقودة فى الخيوط المتفرقة .. يوجد  
بالخلف أنابيب شفافة يجرى فيها سائل باللون الأحمر .. يوجد مربع يشبه عداد  
الكهرباء من الوقت إلى الآخر يضىء ويطفى كالشرار الكهربائى

## البداية

\_ ( تدخل امرأة فى منتصف الثلاثينات

( مندفعة وغاضبة إلى المكان حيث تبحث خلف الكتل الصماء السوداء وتتفقد  
الكتل المعقودة وتبحث عن أشخاص أو أصوات ولا تجد أحد )

المرأة : بقى يعنى فاكرين لما تستخبوا مش هعرف أجيبكم .. أنا وراكم والزمن  
طويل .. بقى تقعدوا تعملوا دوشة وتسهرولى طول الليل وأول ما أنزلكم تستخبوا  
.. ( تذهب إلى أحد الجوانب من المسرح وتتفقد أحد الكتل الصماء ) ..

المرأة : أنا عارفة إنكم سامعنى ومش بعيد تكونوا شايفنى وأنا مش شايفاكم ..  
وهقولها لكم المرة دى ومش هكرر كلامى تانى .. أى حد هسمع صوته ولا أشم  
نفسه هاجى أعلقه من قفاه .. مش هيهمنى هو مين ؟

( تجلس على أحد الكتل ) .. أنا من ساعة ما سكنت المكان الجديد لوحدى

وأنا كل يوم أسمع دوشتكم وأقول خلاص .. هيسكتوا .. هيرىحوا .. هيتخدموا ..  
لكن سايقين فيها .. وكل واحد وواحدة يعملوا الللى هما عايزينه .. هى إيه فاكرينها  
سايبة .. ( تقف وتتحرك للأمام ) .. أنا بقى مابقتش أخاف من حد .. ولو لمحت حد  
جه هنا مش هرحمه ..

( تتراجع )

**المرأة : ( بنبرة حزن ) ..** هو أنا عشان قاعدة لوحدي فاكريني هخاف منكم .. ولا عشان ماليش حد هخاف حد يتخانق معايا .. ( بقوة ) .. أنا قاعدة لوحدي بس بميت راجل .. ومش بخاف ..

**المرأة : ( بحزن شديد وتجلس )** أنا كنت بخاف زمان .. كنت بخاف أخسر حد أو أزعل حد أو حد يسييني ويمشي وأفضل لوحدي .. كنت بخاف إنني أكبر ألقى نفسي ماليش حد .. أو إن ماحدش يسأل عليا .. لكن خلاص .. مابقتش اخاف .. عارفين ليه ؟

**.. (تبكي )** عشان بقيت لوحدي .. ماليش حد غير نفسي وشغلي وبيتتي الصغير .. ومش خايفة .. ( تقف ) .. سامعين .. انا مش خايفة .. ولو شفت حد فيكم ( بلجلجة ) .. همّو .. هض .. أأأ ..

**(تترجع وتمسح دموعها )** هتكلم معاه .. هسمع منه هو جاي هنا ليه وخلاص .. هقوله إنني قادرة أعتمد على نفسي .. هحكيه أنا ليه كنت بخاف زمان ودلوقت لأ .. هقوله إنني بقيت أعرف أعمل حاجات كتير لوحدي .. ومضوع إنني لوحدي مش مضايقتني

**(تحكي في هدوء وتتذكر الماضي بحزن )**

**المرأة :** .. طيب هحكيه عن حبيبي اللي سابني رغم إنني عمرى ما زعلته .. هقوله أهلى مابقوش طايقى .. والناس بتبصلى بصات غريبة .. هقوله حاجات كتير أوى .. بس حد فيكم يطلع وأنا أقوله .. ولّا الحاجات دى تزعل ؟؟

**( بتوتر )** .. طيب هقوله نكته .. نكته بتضحك أوى ..

**( تحكي بحزن شديد )** .. مرة واحدة فكرت إنها تعيش براحتها من غير ما حد يضايقها .. قالوا عليها مجنونة ( تضحك ) ... مش بالذمة نكته تضحك ..

**( تجلس فى خوف حيث تضع رأسها بين قدميها وتخاطب الكتل المعقودة )**

**المرأة :** أنا مش مجنونة .. أنا شايقة الدنيا على طبيعتها .. إنتوا يمكن اللي  
عنكم وعقلكم مخليين الدنيا جميلة .. أو حتى مقبولة .. بس للأسف أنا مش  
شايها كده

.. أنا نفسي أبقى زى باقى البنات أسمع المضايقات وأقول عادى كله بيعدى ..  
أتخبط وأنا ماشية .. وأرجع اتفرج على فيلم رومانسى وأنسى ..  
أشوف الستات بتبصلى على إنى بايرة أو معنسة لأنى عدت 30 سنة ..  
وأضحك فى وشهم وأقولهم

**(ترد على الجمل كأنهم موجودين مع كل كتلة كأنها شخصية )**

**المرأة :** ربنا يخليكى يا طنط .. ربنا يخليكى يا طنط .. ربنا يخليكى يا طنط

**( تقوم المرأة بتقليد السيدات باختلاف شخصياتهم وأصواتهم )**

**المرأة :..** "عقبالك يا حبيبتي" .. " أمه داعياله" .. "نباركلك يوم فرحك" ..  
"مش هنفرح بيكى بقى" ؟

**( تتوقف غاضبة وتعود لشخصيتها )**

**المرأة :** لأ لأ لأ ... مش هتفرحوا .. عشان أنا بنى آدمة من حقى أعيش واحب  
واخرج وافرح واشم هوا نضيف ..

**( تقف )** .. أنا مش مجنونة .. مش مجنونة .. وأى كلمة بسمعها بتأذيني ومش  
بقدر أفوت .. ولما بسمع كلام عن جسمى بتضايق ..

ولما بحس إننا ماينفعش نضحك ولا نعبر عن نفسنا بتخفق ..

ولما بعد كل ده ييجى الناس ترمى اللوم علينا .. فأتمنى الموت .. أبقى عندى  
حق ..

أيوه أنا بتمنى الموت .. هو احنا من إمتى كنا عايشين فى البلد دى ..

**( تخاطب الكتل الصماء )**

المرأة : إمشوا .. وإقعدوا إضحكوا على الكلام اللي بيتقالكم فى الشارع .. أنا مش بلومكم على حاجة .. ما إنتوا لو معملتوش كده مش هتتعرفوا تعيشوا .. هتبقوا زيي .. مجنونة

( تتفقد المكان وتبحث مرة أخرى فى كل ركن من المسرح ثم تقف ) ..

المرأة : برده ماحدش هيطلع يكلمنى .. إوعوا تكونوا خايفين منى وفكرتني مجنونة .. هو أنا عشان زعقت شوية أو إتنرفزت .. ما ده أنا بعمله عشان ماحدش يستضعفنى .. ماحدش يفتكر إنى طيبة .. عشان الطيبين ما بقاش ليهم مكان خلاص ... أنا .. أنا .. أنا حاسة إنى تعبانة .. أنا هطلع آخد أى مضاد حيوى وأنام ..

( تتحرك ثم تعود بقلق .. )

المرأة : ( بخوف ) .. خايفة أتعب أكثر مالقيش حد جنبى .. ( ترفع صوتها ) .. طب لو لقيتوني غبت كتير .. إسألوا عليا .. عشان ممكن يعنى أأ .. أموت وماحدش يعرف .. ( لحظة صمت )

أنا هسيب الباب مفتوح عشان لو جيتم تسألوا .. أو .. أو بلاش .. أنا هقفلوا بالتلات ترايبس عشان أنا لوحدى و .. و .. خايفة .. خايفة أوى ..

\_ تقف وتمسك برأسها وكأن هناك صداد رهيب مع زيادة شرار العداد وأصوا غير مفهومة مع سرعة جريان السائل فى الأنابيب الخلفية مع إضاء البور والخيوط \_

\_ تتضح الأصوات تدريجيا \_ فنجد صوت البنت بأداء وتون صوت مختلف مع إرتفاع الموسيقى \_

الأصوات :

صوت : كبرتى وبقيتى عروسة

1 : مش هنفرح بيكى بقى

2 : عقابلك يا حبيبتى

3 : السنة الجاية أشوفك فى بيتك

4 : مش قادرة تشنكليلك واحد كدة ولا كدة

5 : هى العرسان عميت ولا إيه

\_ تتكرر الأصوات بترتيب مختلف مع رقص الفتاة رقص تعبيرى يعبر  
عن أنها تدبح أو يتم تقطيعها \_

تنتهى الرقصة التعبيرية بوقوعها على الأرض مع انفجار الأنابيب  
الخلفية وينتشر السائل على المرأة وأرض المسرح

إظلام

تمت بحمد الله

للتواصل

المؤلف

هانى عبدالرحمن مهران عبدالحميد

(هانى مهران )

كاتب ومخرج مسرحي

شاعر عامية

للتواصل :

[Hany\\_mahran@hotmail.com](mailto:Hany_mahran@hotmail.com)

[www.facebook.com/hany.mahran.7](https://www.facebook.com/hany.mahran.7)

ت / 01228951987 / 01116206053